

四庫全書

史部

欽定四庫全書

史部

廣西通志卷六十四

五

詳校官給事中臣鄧文泮

檢討臣德生覆勘

總校官進士臣朱 鈐

校對官編修臣盧 遂

謄錄監生臣王元愷

欽定四庫全書

廣西通志卷六十四

名宦

唐

馮盜字明達高州良德人也世為本部大首領隋
開皇中討平潮成等五處叛獠除漢陽太守唐初
廣新二州賊帥高法澄洗寶徹等殺隋官吏附林
士宏盜擊破之又破寶徹兄子智臣於新州嶺外

遂定時隋季擾亂或有以趙佗之業說盜者盜拒
不納武德五年以其地降高祖析為高羅白崖等
八州授盜上柱國高羅總管越國公拜其子智戴
為春州刺史智或為東合州刺史盜徙封耿國公
貞觀初有告盜叛者太宗將發兵討魏徵諫盜無
反狀乃遣散騎常侍韋叔諧喻盜盜遣智戴入侍
五年來朝燕賜甚厚會羅賓諸酋獠叛詔盜率眾
為諸軍先鋒賊據險不可攻盜持弩發七矢連斃

七人賊退走因乘之斬首千餘級太宗命智戴還慰省之盜所居地方二千里勤於為治閱簿最摘

奸伏得民歡心

唐書
本傳

李襲志字重光金州人仕隋為始安郡丞隋末盜起襲志傾產募士乘城拒盜蕭銑林士宏屢攻之不下聞煬帝遇害乃與士民縞素臨三日或勸以效尉佗故事襲志曰吾寧蹈忠而死不為逆節以生拒不納固守二年力窮援絕為銑所陷武德初

高祖命其子元嗣召之襲志說嶺南酋永平郡守
李光度潛圖歸國帝復以書諭曰公朕之宗不可
與異姓比宜及子弟並豫宗正屬籍襲志招致嶺
南六十餘州皆送款五年入朝進柱國封始安郡
公江州都督後討輔公柘為水軍總管轉桂州都
督在州二十八年政尚清簡南荒便之

本傳

丘和河南洛陽人仕隋累官左禦衛大將軍大業
末海南苦吏侵數怨叛帝以和所莅稱淳良而黃

門侍郎裴矩亦薦之遂拜交趾太守撫接盡情荒
憬安之煬帝遇害蕭銑林士弘各遣使招之不從
銑命甯長真攻交趾和遣長史高士廉擊走之武
德四年蕭銑平和以海南之地歸國詔李道裕授
交州大總管譚國公和遣士廉奉表請入朝詔許
之拜左武侯大將軍貞觀十一年卒謚曰襄

本傳

李孝恭高祖從兄子武德三年進封趙郡王拜總
管伐蕭銑克之拜荊州大總管孝恭為置屯田立

銅冶百姓利之六年遷襄州道行臺時荆襄雖定
嶺表未平乃分遣使者綏輯其款附者四十有九
州朝廷號令暢於南海貞觀初改王河間卒贈司

空

本傳

李靖字藥師雍州三原人武德中攝孝恭行軍長
史擊破蕭銑乃度嶺至桂州遣人分道招撫其大
首領馮盎李光度甯長真等皆遣子弟來謁靖承
制授其官爵凡懷輯九十六州戶六十餘萬詔書

勞勉授嶺南道撫慰大使檢校桂州總管靖以嶺海陋遠非震威武示禮義無以變風俗乃率兵南巡所過問疾苦延見父老宣布德意遠近懽服

本傳

李瓌河間王孝恭弟也封漢陽郡王高祖時代兄為荊州都督政務清靜嶺外酋豪數相攻殺瓌使

諭以威德皆受約束不敢亂

本傳

張士貴虢州盧氏人高祖時授虢州刺史謂曰令卿衣錦晝游耳貞觀七年為龔州道行軍總管時

尚獠寇亂士貴督兵征討冒矢石先登所至悉平
諸寇解散南土遂寧太宗勞之曰嘗聞以忠報國
者不顧於身於公見之累遷左領軍大將軍

粵西
文載

參本
傳

李嶠字巨山趙州贊皇人早孤事母以孝聞二十
舉進士累遷監察御史時邕巖二州首領反叛發
兵討擊高宗命嶠往監軍事嶠乃宣朝旨特赦其
罪親入獠尚以招諭之叛者盡降遂罷兵而還

本
傳

唐臨字本德京兆長安人為侍御史持節按交州
刺史李道彥等伸理冤繫三千餘人累遷大理卿

舊志引
廣東志

宋慶禮洛州永年人

本傳作洛州永平人

武后時充嶺南採訪

使時崖振等州首領更相侵掠民苦兵前使人
至輒懼災瘴莫敢往慶禮躬至其境詢問風俗示
以禍福首領皆釋仇相親州境以安罷戍卒五千

人

舊志引
本傳

裴懷古壽州壽春人武后聖歷中始安賊歐陽倩
擁徒數萬剽陷州縣授懷古桂州都督招慰討擊
使未踰嶺飛書招誘示以禍福賊徒迎降自陳為
吏人侵逼乃舉兵耳懷古知其誠乃輕騎赴之左
右曰夷獠難親未可信也懷古曰我仗忠信可上
通於神明况人乎身至壁撫諭倩等大喜悉歸所
掠出降諸酋長素翻覆者亦來款附嶺外悉定

本傳

裴佖先絳州聞喜人宰相炎從子武后時炎坐誣死佖先流嶺南中宗復位求炎後授佖先太子詹事丞遷都督桂州開元中復遷廣州都督政務清

簡百姓愛之

舊志

王暉滄州景城人景龍末為桂州都督桂州舊有屯兵常仰餉衡永暉至築羅郭奏罷屯兵又堰江水開屯田數千頃以息轉漕百姓賴之尋上疏請歸鄉拜墓州人詣闕請留乃下敕曰彼州往緣寇

盜戶口凋殘委任失材乃令至此卿處事強濟遠
邇寧靜築城務農利益已廣隱招綏輯復業者多
宜須政成安此黎庶百姓又有表請不須來也
在桂又踰暮年州人刻石以頌其德後累官尚書
朔方節度開元中卒諡忠烈

節本
傳

李尚隱京兆萬年人開元十三年以河南尹出為
桂州都督尋遷廣州都督仍充五府經畧使性剛
亮與人披心示誠人多德之及去任有懷金以贈

者尚隱不受曰吾自性分不可改易非為慎四知

也歷官太子賓客卒諡曰貞

節本傳

李朝隱字光國京兆三原人開元二十一年以御

史大夫出為嶺南採訪處置使在官軫恤民隱屢

有建議公直廉潔輿論稱之

舊志

張九齡字子壽曲江人自洪州刺史徙桂州無嶺

南按察選補使有才鑒不事苛察巡按之外惟文

史自娛後為中書令天下稱曲江公而不名焉

舊志

盧奐滑州靈昌人少修整為吏有清白稱天寶初以兵部侍郎出為南海太守兼五府經畧使清節自持貪吏斂跡中使市舶亦不敢干法邊俗咸安

廣東
通志

敬超先天寶間為昭州刺史有善政嘗鑿井得泉郡人感其德即名為敬公井以誌不忘

參一
統志

宇文審京兆萬年人擢進士第累遷大理評事揚國忠頗政殺嶺南流人以中使傳口敕行刑議者

嫉其酷乃以審為嶺南監法處置等使全活甚衆

舊志

元結字次山瀘州人乾元初為道州刺史時嶺南諸州寇盜未靖結請免百姓所負租稅及租庸使和市雜物營舍給田流亡歸者萬餘進容管經略使身諭蠻豪綏定八州民樂其教立石頌德

節本傳

宗仲字義仲南陽人安史之亂仲以戰功遷遊擊將軍廣德初廣州市舶使宦官呂太一作亂詔以

楊慎微為嶺南節度使而以仲為節度判官叅其軍與江西觀察使李勉共討之犄角相援者三年仲潛軍間道克復廣南始通貢獻以功授大理少

卿

舊志

李曉庭大厯初任藤州刺史時蠻酋梁崇韋據容州曉庭與經畧使王翃進討克復容州民賴以安

舊志

杜佑字君卿以工部郎中為容管經略使綏懷兵

民盜賊不犯多惠政又遷嶺南節度使為開大衢

疏析塵閉以息火災召拜尚書右丞

參本傳
舊志

李勉字元卿鄭王元懿曾孫也大厯四年拜嶺南
節度使時番禺賊帥馮崇道桂州叛將朱濟時負
險為亂前後累歲陷十餘州勉至遣將李觀與容
州刺史王翽并力進討悉斬之五嶺平勉性廉潔
蕃舶歲至禁絕賄索居官久器用車服一無增飾
及代歸舟至石門悉搜家人所匿犀珍諸物投江

中部人請立石頌德代宗許之進工部尚書封沂

國公卒諡貞簡

本傳

王翊字宏肱晉陽人大歷中拜容管經略使初安祿山亂徵發嶺南兵隸南陽魯炆炆敗衆奔潰谿峒夷獠乘間作亂夷酋梁崇牽自號平南都統與別帥覃問合又與西原賊張侯夏永攻陷城邑據容州前經畧使陳仁琇元結長孫全緒等皆僞治藤梧翊至曰吾容州刺史安可寄理他邑乃出私

財募士有功者許署吏於是人自奮不數月斬賊帥歐陽珪因馳至廣州請節度使李勉出兵併力勉不許曰容陷賊久獠方強今速攻祇自敗耳翊曰大夫即不出師請檄州縣揚言以兵為助冀藉聲勢成萬一功勉然之翊乃移書義州刺史陳仁瓘藤州刺史李曉庭約皆進討引兵三千與賊鏖戰日數遇勉檄止之輒匿不發戰愈力卒破賊擒崇牽悉復容州地又表置順州以定餘亂翊凡百

餘戰生擒首領七十餘人覃問遁去又遣將李寔等分討西原平鬱林等諸州累兼御史中丞招討處置使會哥舒晃反殺節度使呂崇賁嶺南復亂翊命李寔悉師赴廣州覃問復乘虛來襲翊設伏擊之生擒問嶺表平代宗遣使慰勞加金紫光祿

大夫

本傳

路嗣恭字懿範京兆三原人累官江西觀察使大歷八年嶺南牙將哥舒晃殺節度使呂崇賁五嶺

大擾詔加嗣恭嶺南節度使嗣恭募勇敢士八千人以流人孟瑤敬晃為才擢任之使瑤督大軍當其衝晃率輕騎由間道出不意遂斬晃及支黨萬餘聚為京觀俚尙魁宿為惡者皆族誅之五嶺平拜檢校兵部尚書子恕字體仁哥舒晃之平恕功居多

本傳

伊慎兗州人路嗣恭之討哥舒晃以慎為先鋒直逼賊壘疾戰破之斬首三千級由是復始興之地

復與諸將追斬晃於泔溪函首獻闕下嗣恭上其

功授連州長史

本傳

李昌巖大厯間以御史中丞出為桂州刺史兼桂

管觀察御史討平西原賊潘長安刻平蠻頌於鎮

南山下嘗修舜祠立虞山碑建學宮大興絃誦

舊志

戴叔倫字幼公潤州人累官撫州刺史惠民化俗

詔書褒美貞元初遷容管經畧使綏來蠻俗威名

甚著其治政清明仁恕多方略故所至稱最代還

卒於道

節本傳

李復字初陽淮安王神通孫歷饒蘇二州刺史貞元初遷容州刺史充本管招討使先是西原亂吏獲反者沒為奴婢長役之復至使訪親戚一皆原縱在容三年人賴以安轉嶺南節度使會安南經畧使高正平張應相次卒其佐李元度胡懷義等阻兵脅州縣肆為奸賊復誘懷義杖死流李元度

南裔肅然所在稱治徵拜宗正卿

本傳

韋丹字文明萬年人歷殿中侍御史元和初為容
州刺史教民耕織禁游惰興學校民貧自鬻者贖
歸之禁吏不得掠為隸始城州周十三里開屯田
二十四所仁化大行後遷江南西道觀察使築隄
捍江十二里為實以疏漲凡為陂塘五百九十八
所以資灌溉有吏盜倉糧三千斛召而讓之期以
一月還得免吏及期無敢違會解官卒後宣宗讀
元和實錄見丹治行卓然與宰相語周墀對曰韋

丹有大功德被八州沒四十年民思之不忘乃詔

觀察使上丹功狀勒於碑

本傳

韓欽字相之京兆長安人性清簡元和初由殿中
侍御史累遷桂管觀察使所部二十餘州自叅軍
至縣令無慮三百員由吏部補者什一他皆觀察
使商才補職欽下車悉來謁一吏持籍請補缺員
欽下教曰居官治吾不奪其不奉法無望縱舍缺
者須按籍取可任者任之會春服使至鄉有豪猾

厚賄使者求為縣令使為之請飲許之使去坐以
撓法笞其背自是豪右畏戢時詔置五管監兵盡
一境賦不足充費飲處以儉約遂為定制妖賊封
盈以術亂州中飲擒滅之桂境晏然後卒於官

本

傳及
舊志

馬總字會元扶風人元和中以虔州刺史遷安南
都護廉清不撓用儒術教其俗政事嘉美獠夷安
之建二銅柱於漢故處刻宣唐德以繼伏波之迹

徙桂管經略觀察使入為刑部侍郎

本傳

李渤字濬之元和初以山人召起右拾遺奮發敢言後出為桂管觀察使桂有靈渠肇自史祿馬援繼復疏之後為江水潰毀渠遂廢淺每轉餉役數十戶濟一艘渤醺浚舊道鄣泄有宜舟楫灌溉咸利焉又為奏請設常平民便之踰年以病歸

參本傳舊

志

柳宗元字子厚河東人元和十年由永州司馬移

為柳州刺史時劉禹錫得播州宗元曰播非人所
居禹錫有老母在若不偕行便為母子永訣欲以
柳易播會裴度亦為禹錫請乃改連州柳州土俗
以男女質錢過期則沒為奴婢宗元設方計悉贖
歸之尤貧者令傭書視直足相當還其質已沒者
出已錢助贖江嶺間為進士者走數千里從宗元
遊經指授者為文辭皆有法元和十四年卒於官
子幼觀察使裴行立營護其喪妻子得還

本傳

徐申字維降京兆人由景州刺史節度副使遷邕
管經略使邕自黃岡蠻亂經略使路恕韋悅連擊
破之境內粗安然間有叛服申至黃岡納質供賦
不敢桀驁時黃氏儂氏韋氏周氏並為首領而儂
黃最強盛申厚撫之三部二十九州蠻皆定踰年
進嶺南節度使前使死吏盜印署府職百餘員懼
事泄謀作亂申殺之誑悞一不問後卒於官謚曰

平

叅本傳
及舊志

崔方實元和十年為容州兵馬使破蠻賊黃探平其黨與獻俘以聞憲宗嘉之

舊志

孔戣字君嚴冀州人登進士第元和十二年嶺南節度使崔詠卒當置帥帝謂裴度曰嘗論罷蚶菜者誰歟今安在是可往為朕求之度以戣對即拜嶺南節度使既至免屬州逋負緡米及黃金稅倍屬刺史俸約不得為貪暴禁掠人為奴婢士之斥南不能歸及有罪之後百餘族才可用用之貧者

存恤婚嫁之除蕃舶宴餉禁絕僕隸無所求索先是貞元中黃崗諸蠻叛久不平容桂二管利虜掠幸有功請合兵討之弒固言不可帝不聽而士卒多被瘴毒死桂管裴行立容管楊旻皆無功憂死獨弒不邀一旦功交廣晏然大治穆宗立召為吏

部侍郎

本傳

桂仲武元和中為唐州刺史十四年安南酋楊清殺都護李象古初象古貪縱人心不附又惡清之

強自驪州召為牙將會黃岡賊叛詔象古發兵討之象古命清率兵三千赴焉清與其子智烈及所親杜士交回戈夜襲安南殺象古及妻子朝廷命仲武為都護至清不納仲武使人諭其豪酋來歸者七千餘人乃收其城斬清及其子智貞籍其家智烈與士交敗保於長州之鑿溪尋降

舊志

李邵延唐人時劉蕡對策切直為時宰所抑邵與裴休杜牧等登第邵曰劉蕡下第我輩登科能無

厚顏因上疏乞回所授以旌資直不報為賀州刺

史賀人愛之

舊志

蕭倣貞祐公瑀之後太和元年登進士第自集賢

學士拜嶺南節度使南方珍賄叢夥不以入門家

人病取槁梅於公廚以和劑倣知趣市還之

本傳

李憲洮州臨潭人西平忠武王晟子也太和初由

江西觀察使遷嶺南節度使憲勲伐家子有吏治

才政績暴著性明恕善律令詳正大獄活無罪者

數百人

本傳

崔珙博陵人有威重精吏治累官泗州刺史由太府卿為嶺南節度使文宗訪治撫後先珙對精亮有理識帝為嗟賞甫至鎮帝以徐州軍驕數犯法非珙不可乃改武寧節度使

本傳

盧鈞字子和范陽人太和九年由華州刺史擢嶺南節度使海道商舶始至舊帥爭先往賤售其珍鈞一不取蕃獠與土人錯居相婚嫁占田宅吏或

撓之相誘為亂鈞下令蕃土不得通婚禁占田宅
闔部肅壹無敢犯貞元後衣冠得罪流放嶺表者
因而物故其子姓窮弱不能自還則為營棺槨還
葬有疾若喪則經紀醫藥殯斂孤兒弱女為之婚
嫁廩助凡數百家又除采金稅南方服其德不嚴
而化遷戶部侍郎

本傳

王式宰相播子也由晉州刺史遷安南都護式有
才略至交趾市芳木為柵周十二里浚壕繚柵外

植刺竹寇不能攻後蠻兵入掠錦田步式遣人開
諭之一夕引去安南都校羅行恭久專府政式至
黜於邊徼初忠武戌卒以黃冒首號黃頭軍天下
銳卒也交趾數有變懼式威不自安譁曰黃頭軍
將渡海襲我矣相率夜圍城請都護北歸我須此
城禦黃頭軍式方食或勸出避之式曰吾足一動
則城潰矣徐被甲引左右乘城責之叛者走翼日
盡捕斬之有杜守澄者據谿崗不可制式離間其

親黨守澄走死初容管災歉停貢賦式始上輸占
城真臘咸慕義入獻會寧國劇賊裴甫作亂徵式

討之代去

本傳

韋宙江西觀察丹子也宣宗時以循吏子擢侍御
史出為永州刺史州負嶺寡聚蓄宙始築常平收
穀羨餘以賑乏俚俗婚會喪葬條約使如禮民遂
化歷遷嶺南節度使南詔陷交趾宙撫兵積備招
徠流移嶺表種落莫不信悅以幹理聞加檢校尚

書左僕射

參舊志
本傳

鄭從讜字正求鄭州滎陽人咸通中累官宣武節
度使以善最聞改鎮南東道節度先是林邑蠻內
侵召天下兵進援會龐勛亂不可遣而鎮兵寡弱
從讜募土豪署其酋右職為約束使相捍禦交廣
晏然僖宗立召為刑部尚書

本傳

魚孟威咸通中自黔南移鎮桂州時李渤所浚水
道盡廢孟威大為經理功成而民不擾又有李仁

者為邕州司馬以鬱水橫溢為害乃引渠分流用

洩水勢民賴真安

舊志

鄭畋字台文滎陽人為翰林學士知制誥宰相劉
瞻以諫忤懿宗賜罷畋草制書多褒言韋保衡等
論其附下罔上貶梧州刺史初交廣邕南兵歲運
嶺北五道米往餉之舟多覆敗及畋為中書平章
事奏請以嶺南鹽鐵委之廣州節度使韋瓘歲煮
海取鹽直四十萬緡市虔吉米以贍安南而罷荆

湖等漕役軍食遂饒

節本傳

鄭愚番禺人咸通初為桂管觀察使廉察吏弊闔境肅然時嶺南西道節度使蔡京苛慘淫刑為邕州軍士所逐詔愚代之瘡痍嗷嗷拊循不暇會南詔入寇安南都護蔡襲告急救發荆南湖南兩道兵二千桂管義征子弟兵三千受愚節度而嶺南東道又奏蠻兵必向邕州宜先保護未可馳赴敕愚分兵備禦時諸道兵竟不進而襲又求益兵愚

支杆半載邕州得保無虞朝廷復督責之愚自以弗勝將畧請解還乃詔義武節度使康承訓代之承訓上言愚在鎮善守狀朝廷始知愚功召為禮

部侍郎

舊志

薛堅石乾符中桂管觀察使李璿失政堅石為支使屢規正之璿不能從被逐堅石攝留務移牒鄰

道禁遏亂兵一方以安

通鑑

辛謹蘭州金城人乾符中為嶺南西道節度使自

宣宗以來南詔寇邊中國為之虛耗至是其君驃
信遣使來請和謹奏以為諸道兵戍邕州歲久饋
餉疲敝請許其和使羸瘵息肩詔許之謹先後遣
使至南詔相繼道卒復慰諭攝巡官徐雲虔往雲
虔至善闡見驃信諭之曰順祖考孝也事大國義
也息戰征仁也審名分禮也四者皆令德也可不
勉乎驃信從之待雲虔甚厚留十七日而還自是
蠻不為寇謹既和南詔以管内儂侗黃侗素結南

詔復招撫其酋儂金勒等與之通歡持牛酒音樂
賚之并遺其母衣服母賢者誚讓其子金勒感悟
始罷兵邕遂成樂土

叅舊志唐書
西原蠻傳

謝肇廣明元年為容管經畧使討平叛卒上狀詔
答云朕以容南寄重隆恩遂行果能治彼克妖全
活黎庶布威令於一方息蠻氛於千里

舊志

周元靜為桂管經畧使唐末所在兵起元靜約部
內守令將校廣農輯兵四境信服安州防禦使家

晟與指揮使劉士政等馳襲桂詭奪其軍元靜率兵以戰不勝死之部衆咸就死無棄去者

舊志

龐巨昭僖宗時為容管觀察留後會黃巢寇嶺南巨昭與高州刺史劉昌魯率羣蠻據險以拒之巢衆不敢入境朝廷嘉其功乾寧四年置寧遠軍於容州旋以巨昭為節度使以昌魯為高州防禦使劉隱據嶺南二州不從隱遣其弟襲攻之皆不克昌魯自度終非隱敵乃自歸於楚楚王馬殷遣橫

州刺史姚彥章將兵迎之巨昭亦歸楚

舊志

宋

潘美字仲詢大名人少儻有大志初事周世宗以功遷西上閤門副使先是太祖遇美素厚及即位以功歷進潭州防禦使時嶺南劉鋹數寇桂陽江華美擊走之谿峒蠻獠自唐以來不時侵略頗為民患美窮其巢穴多所殺獲餘加慰撫夷落遂定開寶三年征嶺南以美為行營諸軍都部署朗

州團練使尹崇珂副之進克富川鉉遣將率衆萬餘來援遇戰大破之遂克賀州十月又下昭桂連三州西江諸州以次降進次韶州韶廣之北門也賊衆十餘萬聚焉美揮兵進乘之韶州遂拔斬獲數萬計鉉窮蹙四年二月遣其臣王珪詣軍門求通好又遣其左僕射蕭淮中舍人卓惟休奉表乞降美因諭以上意以為彼能戰則與之戰不能戰則勸之守不能守則諭之降不能降則死不能死

則亡非此五者他不得受美即令殿直冉彥袞部
送淮等赴闕銀復遣其弟保興率衆拒戰美即率
厲士卒倍道趨柵頭距廣州百二十里銀兵十五
萬依山谷堅壁以待美因築壘休士與諸將計曰
彼編竹木為柵若攻之以火彼必潰亂因以銳師
夾攻之萬全策也遂分遣丁夫數千人持二炬
間道造其柵及夜萬炬俱發會天大風火勢甚熾
銀衆驚擾來犯美揮兵急擊之銀衆大敗斬數萬

計長驅至廣州，餼盡，焚其府庫，遂克之。擒餼，送京。師露布以聞。即日命美與尹崇珂同知廣州，兼市舶使。五月，拜山南東道節度，兼嶺南道轉運使。土豪周思瓊聚衆負海為亂，美討平之。嶺表遂安。後贈中書令，謚武惠。

節宋史本傳

樂繼能，全州刺史，權知桂州。從潘美下昭、桂二州。

有功

粵西文載

尹崇珂，秦州天水人。累遷殿前都指揮使。乾德中，

征嶺表以從珂為行營馬步軍副都署克廣西擒
劉鋹即日詔與潘美同知廣州兼市舶轉運等使
錄功遷保信軍節度未幾南漢開府樂範容州都
指揮使鄧存忠韶州賊帥周思瓊春恩道都指揮
使麥漢瓊等據五州之地以叛崇珂討之太祖遣
中使李神佑督戰數月盡平其黨還治所六年卒
贈侍中遣中使護其喪歸葬洛陽

廣東通志

王明字如晦成安人太祖開寶三年大舉南征以

明為隨軍轉運使供億不缺賀州未下明與主帥計曰當急攻之恐援兵至則我師勝負未可知諸將頗猶豫明乃督丁夫數千堙其濠塹直抵城門

城中懼遂下

粵西
文載

范旻字貴參知邕州兼水陸轉運使俗好淫祀輕醫藥重鬼神旻下令禁之割俸市藥以給病者愈者千計後刻方書於石鄧存忠劫土人二萬衆攻州城七十餘日旻屢出戰矢集於胸猶激勵將卒

殊死戰賊乃少卻堅壁固守援兵至而圍解賜璽

書獎之所著有邕管記三卷

舊志

侯仁寶汾州平遙人父益封齊國公仁寶以蔭遷
太子中允為趙普妹婿盧多遜與普有隙普罷相
即以仁寶知邕州州之右江生毒藥樹宣化縣人
常採貨之仁寶以聞詔盡伐去九年不代太平興
國中上書陳取交州之策太宗大喜令馳驛召歸
多遜遽奏曰若召仁寶其謀必泄蠻夷增備未易

取也不如授仁寶飛輓之任且經度之別遣偏將
發荆湖士卒一二萬人長驅而往勢必萬全帝以
為然遂以仁寶為交州水陸計度轉運使前軍發
遇賊鋒甚盛援兵不繼遇害死江中太宗聞之甚
悼惜特贈工部侍郎錄其子延齡延世並為齋郎

節宋史
本傳

王繼勳開寶間從王師伐南漢繼勳為賀州道馬
步軍都監有武勇在軍陣以鐵鞭鐵槩鐵撾自隨

軍中目為王三鐵云

粵西
文獻

楊居政開寶中知賓州始創州治建城衛民設策
禦寇民賴保障前守蒙延永為賊所害居政撫其
二子創田宅以居其惇厚如此後延永之孫世濟
其美居政有力焉

舊志

許仲宣字希榮青州人開寶中為廣西轉運使會
征交州值炎瘴士卒死者十二三大將孫全興等
失律仲宣因奏罷其兵不待報即以兵分屯諸州

開庫賞賜草檄諭交州交州送款內附遣使修貢
仲宣復上書待罪太宗嘉之初仲宣之遣兵也人
或難之仲宣曰若待報將積屍橫野矣誅一族活

萬夫吾何恨哉

舊志

柳開字仲塗大名人開寶六年舉進士雍熙中為
崇儀使知寧遠軍徙全州全西延崗有粟氏聚族
五百餘人常鈔劫民口糧畜開為作衣帶巾帽選
牙吏勇辯者得三輩使入諭之曰爾能歸我即有

厚賞給田為屋處之不然發兵深入滅爾類矣粟氏懼留二吏為質率其酋四人與一吏偕來開厚其犒賜吏民爭以鼓吹飲之居數日遣還如期攜老幼悉至開即安其居業作時鑑一篇刻石戒之遣其酋入朝授本州上佐賜開錢三十萬淳化初移知桂州初開在全州嘗於城北得泉石之勝築室山椒率士人講讀其間邦人名其山曰柳山以

志遺愛云

參舊志

邊珣字待價華州鄭人太宗即位充廣南西路轉運使初至桂州會張頌卒藁葬城外僕人分匿其家財珣召官吏悉追取之部送其柩歸灘州又屬郡守與護軍有忿隙者但奏令易地不致之罪釁太平興國五年代歸拜右諫議大夫

舊志

魏廷式字君憲大名人以吏部員外郎知桂州所至以嚴明稱

粵西文載

洪湛字惟清昇州上元人累官右拾遺端拱初伏

闕上書請立許王元禧為儲貳太宗怒黜知容州
容有戍卒謀竊發者湛偵得其實亟斬之容賴以

安遷比部員外郎

舊志

姚坦淳化初知潯州卓有異政盜息民安

州志

陳堯叟字唐夫閬州人累遷工部員外郎廣南西
路轉運使嶺南風俗病者禱神不服藥堯叟有集
驗方刻石桂州驛又以地氣蒸暑為植樹鑿井每
二三十里置亭舍具飲器人免暍死會加恩黎桓

為交州國信使初將命者必獲贈遺數千緡桓責賦斂於民不堪其苦堯叟知之遂奏召桓子授以朝命而却其私覲又捕諸亡命來奔者歸桓桓感恩亦捕海賊為謝先是歲調雷化高藤容白諸州兵使輦軍糧給瓊州其兵不習水利率多沈溺咸苦之海北岸有遮角場正與瓊對伺風便一日可達堯叟因規度移四州民租米輸於場地令瓊州遣蛋兵具舟自取人以為便咸平初詔諸路課民

種桑棗堯叟上言其略以五嶺之俗田多山石地
少桑蠶惟麻苧之利所種與桑柘殊易又國家軍
須所急布帛為先因先時勸諭部民杼柚滋廣歲
以鹽錢折變收市充溢至三十餘萬匹請自今許
以所種麻苧頃畝折桑棗之數依例為課於公私
交濟詔從之尋代還未幾會撫水蠻酋蒙令國殺
使臣擾動命堯叟為廣南東西兩路安撫使事平
遷兵部後至右僕射卒諡文忠

本傳

郎簡字叔廉杭州臨安人進士及第真宗時特改
秘書省著作郎知分宜縣徙知藤州惟以宣上德
救民患為意興學養士一變其俗

舊志參浙
江通志

恭輔咸平中判龔州敦尚愷悌民孚政肅有循吏

風

粵西
文載

胡則字子正永康人果敢有才真宗時為廣西轉

運使按宜州重辟十九人為辨活者九人

粵西
文載

宋師高咸平初羅蠻率眾內寇據土堡寨師高領

兵戡定不踰月而俘馘無遺類以功辟知宜山縣

再遷知宜州四境安堵

粵西文載

陳執中南昌人咸平中出知梧州不鄙薄其民陶以豈弟上復古要道三篇真宗異而召之後為平

章事

舊志

曹利用字用之趙州寧晉人累官忠州刺史景德四年知宜州劉永規馭下殘酷軍校陳進乘衆怨殺永規叛陷柳城縣圍象州嶺南騷動上以利用

曉方畧盡心於事授利用為廣南安撫使利用辟
監涔陽酒稅孫繼鄴與俱南遇賊武仙賊持健鏢
蒙采盾衣甲堅利鋒鏑不能入利用使士持巨斧
破盾遂敗賊引兵趨象州復破之大烏嶺斬陳進
撫安其黨嶺南平以功遷引進使官至尚書左僕
射兼侍中武寧軍節度使

參舊志

曹克明字堯卿雅州人景德中蠻寇邕州改供備
庫副使知邕州左右江蠻尚二十六克明召其酋

長諭以恩信是歲承天節相率來集克明慰拊出
衣服遺之感泣而去獨如洪岡恃險不至克明諭
兩江防遏使黃衆盈引兵攻之斬其首領陸木前
梟於市宜州澄海軍校陳進叛時鬱江暴漲州城
崩摧克明率丁夫伐木為連舫維之水涯狀如郭
郭又多張旗幟浮巨楫陳兵其上為守禦備募谿
崗兵三千而黃衆盈亦濟兵千五百將趣象州會
安撫使曹利用約克明會兵行次貴州遇賊大敗

之斬首四百餘級賊平代還會撫水蠻叛徙宜融
昭桂柳象邕欽廉白十州都巡檢使兼安撫使既
至蠻酋進藥一器曰谿崗藥藥箭中人以是解之
可不死克明曰何以試之曰請試以雞犬克明曰
當試以人乃取藥箭刺酋股而飲以藥即死羣蠻
慚懼而去是年冬安撫都監王文慶馬玉出天河
砦東克明與中人楊守珍出桂嶺西磴道危絕林
木深阻蠻多伏弩以待玉所向力戰屢敗蠻軍是

時朝廷意在招附數詔諭克明克明乃至撫水州
與知州林承貴等約盟而還未幾知桂州兼管勾
谿崗公事始置谿崗司代還知滁州徙鼎州會交
趾李公蘊寇邕州以文思使復知邕州既至遣人
入交趾諭以利害公蘊拜表謝罪遷西上閤門使
歷知登舒邵三州

參舊志

周輔成道州人真宗時歷官賀州桂嶺令有惠政
明嘉靖間提學僉事黃佐謂公實生濂溪啓宋道

學之源以德以功宜入祀典而郡乘有闕甚非所以旌名宦崇道本也桂嶺雖廢賀志不泯特表章

之舊志

廣西通志卷六十四

欽定四庫全書

廣西通志卷六十五

名宦

宋

程珦河南開封人仁宗時以珦為黃陂尉徙知龔
州時宜僚區希範既誅鄉人忽傳其神降言當為
我南海立祠於是迎其神以往至龔珦使詰之對
曰比過潯潯守以為妖投江中逆流而上守懼乃

更致禮珣使復投之順流去其妾乃息郡故有暢
巖珣與顥頤講學其中熙寧法行守令奉命恐後
珣獨抗議指其未便使者李元瑜怒即移病歸

參舊志

魏瓘字用之歙州人歷官提點廣南西路刑獄邕
州獠戶緣逋負沒婦女為傭者一千餘人悉奏還
其家遷轉運使劉鋹時計口以稅雖舟居亦不免
至是始除之減柳州無名役四百人所至惠洽遷

太常少卿

舊志

孫抗江南黟縣人仁宗時知潯州改作州學文廟
召吏民子弟之秀者親為講說學者日益衆習俗
為之變後遷廣西路轉運使儂智高叛抗轉餉無
缺又以餘力督守吏治城塹修器械屬州多完

叅本

傳

蕭定基字守一吉水人累官侍御史宜州蠻為寇
以定基為安撫使定基馳至問所以反故遣兵萬

餘守要害戒諸將無妄擊蠻遂遁仁宗曰邊臣好生事定基乃能如是召還除淮淝荆湖制置發運

副使

節本傳

蘇紳字儀甫晉江人安化蠻蒙光月率衆寇宜州敗官軍殺鈐轄張懷志等六人紳上言以為可以緩圖不可以速取請命轉運使備數年兵食為持久計伺便即圖深入不越一年必就殄滅從之遣

馮伸已守桂州經制之蠻遂平

粵西文載

馮伸已字齊賢始官桂州兵馬都監俞獻可薦知
宜州天聖中改桂宜融柳象沿邊兵馬都監復知
宜州代還道改知邕州未幾改知桂州兼廣西鈐
轄道江陵會安化蠻犯邊官軍不利仁宗遣中人
趣伸已討之伸已日夜疾馳至宜州繕器甲募丁
壯轉糧餉由三路以進伸已臨軍單騎出陣語酋
豪曰朝廷撫汝甚厚汝乃自取滅亡耶今我奉天
子命來汝聽吾言則生不則無噍類矣衆仰泣羅

拜明日蠻渠棄兵械率衆降軍門初部卒以覆將
畏匡伸已曰紀律不明主將也戰士何罪請於朝
貸其死以勞遷西上閤門使知宜州樂善蠻寇武
陽伸已遣諭禍福蠻大悅悉還所掠又莫世堪負
險強黠抄掠邊戶為疆場患伸已設伏擒捕皆置
於法遷果州團練使

本傳

梅摯景祐間知昭州文章政事綽然有聲時官廣
南者多憚嵐瘴不願往摯作五瘴說鑄於石謂仕

者宜先除其身瘴而勿病於土瘴則逆氣不干雖

荒遠無害以示勸焉

節舊志

張守約字希參濮州人歐陽修薦其有智略知邊事權知融州尙將吳儂恃險為邊患捕誅之尋詣

闕條陳地方利害皆見納

舊志

桑懌雍丘人勇力過人有謀畧宜州蠻叛殺海上巡檢官軍不能制因命懌討平之還授閤門祇候懌讓其賞於已上者或譏以好名歎曰士當自信

其心爾若欲避名則善皆不可為矣辭益堅不許
寶元初遷西頭供奉官廣西駐泊都監後徙涇原

討元昊死之

節本傳

梁適字仲賢東平人康定中知梧州嶺地南漢時
民間折稅已重轉運使以調不足復欲折之適為
奏免民賴以甦皇祐中為樞密副使儂智高入寇
移嫚書求邕桂節度帝將受其降適曰若爾嶺外
非朝廷有矣乃遣狄青討之賊平帝曰若非適言

南方安危未可知也

本傳參
舊志

趙抃衢州人慶厯中為宜州別駕愛民如子尤加
意士類暇則集諸生於香山寺講學有卒誤殺人
法當死方繫獄病疽未潰抃使醫療之得不死尋
會赦免其愛人之周類此

舊志

陶弼字商翁永州人慶厯中從楊畋討湖南瑤大
破之以功授陽朔主簿懷智高犯南海畋為安撫
使辟叅軍謀會蔣偕戰死餘衆散亡恐被誅多降

賊弼數與之遇亟矯敕命揭榜道上諭之歸許以不死凡得千五百人調陽朔令課民植木官道旁俾行者夏秋無暑暍之苦他邑悉效之知賓容欽三州換崇儀副使遷為使知邕州邕經儂寇井隧蕩然人不樂其生弼綏輯惠養至忘其勤諸崗獻土物求內附弼降意撫納謝其贄皆感悅無犯邊者邕地卑下夏大雨彌月弼亟窒垠江三門諭兵民即高避害俄而水大至弼先身版車預為土囊

千餘水從竇入隨塞之城雖不壞而人皆乏食則
為發廩以賑於內方舟以饁於外旬有五日水乃
退公私一無所失弼久於邕請便郡徙鼎州郭達
南征復使知邕州民再罹禍亂散匿山谷弼率百
騎深入左江峒民知其至扶老攜幼以歸會交人
納款達欲班師恐為所襲乃夜起軍由是騎步相
蹈藉亂行賊隔江陰伺覘知弼殿弗敢追弼申令
帳下毋動遲明結隊徐行達賴以善還建所得廣

源崗為順州枕榔為縣進弼西上閤門使留知順
州交人襲取枕榔揚聲欲圖州獨難弼素得人心
以是終弼在不敢犯加東上閤門使未拜而卒弼
樂士好施俸祿悉以與人家至貧不恤也既死妻
在鄉里僦屋以居

本傳

盧革字仲新德清人慶厯中知龔州蠻入寇桂管
騷動革經畫軍須先事而集移書安撫使杜杞請
治諸郡城及易長吏之不才者又言嶺外小郡合

四五不當中州一大縣無城池甲兵之備將為賊困宜度遠近并省之後儂智高來九郡相繼不守

皆如革慮

舊志

杜杞字偉長無錫人累遷尚書虞部員外郎知橫州時安化蠻寇邊殺知宜州王世寧杞出兵討平之上言橫為邕欽廉三郡咽喉地勢險阻可屯兵為援內制廣源外控交趾願擇文臣識權變練達嶺外事者以為牧守使經制邊事會區希範誘白

崖山蠻蒙趕反襲破環州帶溪普義鎮寧砦嶺外
騷然擢杞為廣南西路轉運按察安撫使行次真
州先以書諭蠻聽其自新次宜州蠻無至者杞令
州校出獄囚脫其械使入峒說賊不聽乃勒兵攻
破白崖黃坭九居山砦及玉峒焚毀積聚斬首百
餘級復環州賊散走希範走荔波峒杞遣使誘之
趕求降杞詐許而飲以曼陀羅酒伏兵發盡殺之
後三日又獲希範醢之御史梅摯劾杞殺降失信

詔書戒諭遷兩浙轉運使

本傳

蕭固字幹臣新喻人慶厯間官廣西都巡檢提舉
兵甲谿峒事值區希範作亂後初經兵燹固因其
故俗治以寬大廣西遂安未幾遷廣西計度轉運
使時儂智高誘聚亡命窺伺邊境固深憂之乃上
言請以一官撫之使抗交趾且可以紓患樞密以
智高故屬交趾納之恐開邊釁不從會智高果反
復歸責於固左遷知吉州居頃之復以直昭文館

知桂州時儂宗尚擁衆故地固招降之邊境以寧

粵西
文載

孔宗旦魯人為邕州司戶叅軍儂智高未反時宗
旦度智高必反以書告知州陳珙珙不聽後智高
破橫州即載其親往桂州曰吾有官守不得去無
為俱死也既而州破被執宗旦罵賊不屈遂被害
事聞贈太子中允

舊志

孫沔字元規會稽人中進士第知秦州時儂智高

反沔入見帝以秦事勉之對曰秦州不足煩聖慮
陛下當以嶺南為憂明日聞蔣偕死帝諭執政曰
南事誠如沔所料即以沔為廣南廣西路安撫使
沔請益發騎兵且增選偏裨求武庫精甲叅知政
事梁適折之曰毋張皇沔曰前日惟亡備故至此
今指期滅賊非可以微倖勝乃欲示鎮靜耶居二
日促行才與兵七百沔憂賊度嶺而北乃檄湖南
北曰大兵且至其繕治營壘多具宴犒賊疑不敢

北侵會遣狄青為宣撫使沔與青會青與智高遇
戰歸仁鋪智高敗走青還沔留治後事遷給事中
及還帝問勞解玉帶賜之

節本傳

狄青字漢臣西河人善騎射歷官至權樞密副使
皇祐中廣源州蠻儂智高反陷邕州又破沿江九
州圍廣州嶺外騷動楊畋等師久無功又命孫沔
余靖為安撫使討賊仁宗猶以為憂青上表請行
自言願得蕃落騎數百益以禁兵羈賊首致闕下

帝壯而許之遂除宣徽南院使宣撫荆湖南北路
經制廣南盜賊事時智高還據邕州青合孫沔余
靖兵次賓州先是將偕張忠皆輕敵敗死軍聲大
沮青戒諸將毋妄與賊鬪聽吾所為廣西鈐轄陳
曙乘青未至輒以步卒八千犯賊潰於崑崙關殿
直袁用等皆遁青會諸將堂上揖曙起并召用等
三十人按以敗亡狀驅出軍門斬之沔靖相顧曙
眙諸將股栗已而頓甲令軍中休十日覘者還以

為軍未即進青明日乃整軍騎一晝夜絕崑崙關
出歸仁鋪為陣賊既失險悉出逆戰前鋒孫節搏
賊死山下賊氣銳甚青執白旗麾騎兵縱左右翼
出賊不意大敗之其黨黃師宓儂建中智中及偽
官屬死者五十七人生擒賊五百餘人智高夜縱
火燒城遁去遲明青按兵入城其為賊所俘脅者
悉慰遣之斂屍築京觀於城北隅時賊屍有衣金
龍衣者眾謂智高已死欲以上聞青曰安知非詐

耶寧失智高不敢誣朝廷以貪功也初青之至邕
也會瘴霧昏塞或謂賊毒水上流士飲者多死青
殊憂之一夕有泉湧砦下汲之甘衆遂以濟始交
趾願出兵助討智高余靖言其可信詔許之青既
至檄余靖無通使假兵即上奏曰假兵於外以除
內寇非我利也以一智高而橫蹂二廣力不能討
乃假兵蠻夷蠻夷貪得忘義因而啓亂何以禦之
請罷交趾助兵從之賊平人服其有智略後卒謚

武襄節本傳

余靖字安道曲江人舉進士累遷衛尉卿知虔州
丁父憂去懷智高反邕州乘勝掠九郡圍廣州乃
就喪次起靖知潭州改桂州詔以廣南西路委靖
經制智高西走邕州靖策其必結援交趾而脅諸
酋以自固乃奏乞許交趾李德政會兵擊賊於邕
州又募懷黃諸姓酋長皆縻以職使不與智高合
既而朝廷遣狄青孫沔將兵共討賊青却交趾援

兵不用賊平就遷靖給事中及諸將班師獨留靖
廣西遣人入特磨道擒智高母子弟三人生致闕
下嘉祐五年交趾蠻申紹泰寇邕州殺五巡檢時
靖徙知青州詔復以靖安撫廣西至則召交趾用
事臣費嘉祐詰問之嘉祐至對以近邊種落相侵
誤犯官軍願悉推治還所掠及械罪人以自贖靖
許之遣嘉祐歸遂定後卒謚曰襄

本傳

楊文廣太原人狄青南征時為廣西鈐轄知邕州

撫馭有方士卒樂為效死時以名將稱

粵西
文載

劉几字伯壽洛陽人儂智高犯嶺南几上書願自
效以為廣東西捉殺使疾馳至長沙見狄青曰賊
若退守巢穴瘴毒方興須止以俟再舉若恃勝求
戰成擒易耳賊悉眾來大戰於歸仁鋪前鋒孫節
死几以右軍搏鬪自辰至巳勝負未決几言於青
出勁騎五千張左右翼擣其中堅賊駭潰進皇城

使

舊志

張玉字寶臣保定人從狄青征儂智高抵歸仁鋪與賊戰官軍小却玉率右突騎橫貫之賊大潰以

功遷昭州防禦使

粵西文載

周沆字子貞益都人儂智高亂定仁宗命安撫廣西沆宣布天子德澤遍行郡縣邕民避寇棄業吏用常法滿半載則聽人革佃沆曰是豈與凶年詭征役者同科奏伸其期佃乃不革

舊志

朱壽隆字仲山諸城人提點廣西刑獄狄青討賊

欲殺裨將不用命者數人壽隆極論罪不當死青
感其言而止智高平所在修營城障廉知貴州虐
用其人壽隆馳詣州械送獄奏黜之老稚婦女遭
亂流轉不能自還者徽州縣給資送之還舊制溪
蠻侵暴羈縻州雖殺人無得讐報壽隆請聽相償
蠻始畏戢

本傳

王罕字師言成都華陽人為廣東轉運使儂智高
入寇見罕嚴備不敢犯後謫監信州酒稅安撫使

孫沔言罕有功復以為西路轉運使時智高已遁
儂宗旦尚據險聚衆邕守蕭注謀擊之罕呼宗旦
子曰新謂曰汝父內為交趾所仇外為邊將希賞
之餌非計也汝歸報擇利而為之於是父子俱降
罕所泣號清敏然寬雅有局度士民莫不愛戴之

舊志叅粵
西文載

李忠輔字道舉零陵人皇祐初以恩格授官攝遷
江令有治績桂林北出興安有靈渠漢唐歷修之

至是復有隳壞隄防罅漏漕舟歲梗帥司以屬忠
輔乃大完築盡復其故迹溉田甚多調桂州司戶
叅軍遷知陽朔縣大兵南出邑當大道使者旁午
羽檄紛馳忠輔一無所擾而供億悉辦未幾引疾

歸

粵西
文載

姚嗣宗皇祐初歷守潯州冀州平獄訟定禮儀百

姓順則有循聲

粵西
文載

張立任廣西都監皇祐中儂賊陷十二郡據邕州

驅立殲焉立臨刑大罵不為屈

舊志

張拱為廣西都監儂賊圍邕州拱自賓州引兵來

援既入而城陷拱罵不屈死踰月得其屍如生

舊志

孫節開封人少隸軍籍以才勇補右侍禁狄青討

智高辟隸麾下至歸仁驛節為前鋒直前搏戰賊

銳甚節鏖山下俄中鎗而死特贈忠武軍節度使

留後

宋史

和斌字勝之濮州鄆城人狄青南征使部騎兵為

前鋒青駐賓州十日以怠寇既乃倍道兼行斌以
兵疲於險利在速戰即日度關鏖賊歸仁鋪孫節
死斌引騎血戰繞出賊後遂敗之擢文思副使權
廣西鈐轄累歲徙涇原安南入寇復徙廣西累遷
皇城使昭州刺史撫水蠻羅世念犯宜州守將戰
死斌乘暑晝夜趣兵至懷遠寨因示弱驕之蠻果
大至斌走誘至平坂列八陣以待之分騎翼其旁
自被甲出為衆士先殊死戰蠻大敗世念率酋黨

內附遂以榮州團練使知宜州弒老將能以恩信
得邊人心嶺南珍寶一無所畜邊吏欲希功造事
皆憚不敢發或巧為謀報啓釁亦必折其姦謀故
所至無事士大夫稱之

節本傳

張日新安仁人皇祐間為廣西邕州都監儂智高
陷邕日新力戰不支被執不屈死之

江西通志

呂璫字吉甫晉江人通判宜州時儂智高入寇轉
運使檄璫與兵會將二千人躡賊後得首虜為多

終光祿卿

舊志

賈達藁城人官至殿前班副使從狄青征儂智高戰於歸仁鋪既陳青誓衆曰不待令而舉者斬時左將孫節戰死達為右將軍先鋒私念所部兵數困易衄兵法先據高者勝苟復待命而賊乘勝先登吾事去矣即日引軍趨山既定賊至達麾衆馳下仗劍大呼斷賊為二賊首尾不相救遂潰達詣青請罪青拊其背勞謝之搜邕州城青使達入括

公私遺墜固辭終殿前都指揮使諡武恪

本傳

李師中字誠之楚丘人提點廣西刑獄桂州靈渠
故通漕歲久石室舟滯師中即焚石鑿而通之邕
管有馬軍五百馬不耐暑多死師中謂地多險阻
無所事騎奏罷之初邕州蕭注宜州張師正謀啓
邊釁注欲以所管蠻酋酋豪往討交趾詔下師中
議師中不可遂罷會蠻酋申紹泰入追亡者害巡
檢宋士堯注又張皇為奏仁宗為之肝食師中言

無足憂因劾注邀功生事於是謫注泰州安置師
中攝帥事交趾耀兵於邊聲言將入寇師中草六
榜揭境上披露其情賊不敢動即日貢方物紹泰
懼委巢穴遁儂智高子宗旦保火峒前將規討以
幸賞遂固守師中檄諭禍福立率其族以地降邊
人化其德多畫像立祠以祀

節舊志

陸誥字介夫餘杭人嘉祐中知桂州奏言邕去桂
十八驛往時經畧使未嘗行飭武備臣願一往使

羣蠻知省大將號令因以聲震南交詔可時交人
浸驕詵至部其使者黎順宗來偃蹇如故態詵絀
其禮召問折諭導以所當為懾伏而去詵遂至邕
州集左右江四十五峒酋詣麾下閱簡壯丁五萬
補置將吏鑄印給之軍聲益張交人滋益恭遣使
入貢召為天章閣待制

節本
傳

王世行字祖道開封人治平元年知全州事初任
全州都巡檢使會儂智高入寇率民調兵以扼賊

衝民不失業安撫使吳中復等交薦詔從其請世
行至治廟興學表孝子廬盡草供億魚苗斑竹之
累期月間郡大治及歿民廟祀於城西磐石之側

黃庭堅有記

舊志

劉蒙字資深宜黃人治平初舉進士累官嶺南西
道提點刑獄清潔不可干以私

舊志

劉芑字資中蒙弟舉進士辟廣西經幹屢挫蠻寇
遷知惠州事清節如其兄雖為郡守間絕糧死之

日家無十金之儲

舊志

姚道源治平間知鬱林州三載未嘗決大辟

舊志

苗時中字子居宿州人熙寧中文人犯邊擢廣西
轉運副使師次富良江久不進時中曰師無進討
意賊必從間道來乘我不備冀萬一之勝因密備
之既而果從上流來戰敗始納款徙梓州會興師
討蠻乞弟時中以攢運功遷兩階後進直龍圖閣

知桂州

節本傳

蘇緘字宣甫晉江人舉進士累遷秘書丞知英州
以禦儂智高功換供備庫副使熙寧四年交趾謀
入寇以緘為皇城使知邕州緘即以書抵知桂州
沈起及代者劉彝皆不聽八年蠻遂入寇陷欽廉
破邕四砦緘聞其至設方略拒守選勇士拿舟逆
戰斬蠻酋二邕既受圍緘晝夜行勞士卒發神臂
弓射賊所殪甚衆賊為雲梯又為攻濠洞蒙以華
布緘悉焚之蠻計窮將引去而知外援不至或教

賊囊土傳城頃刻高數丈蟻附而登城遂陷緘猶
領傷卒馳騎戰愈厲而力不敵乃曰吾義不死賊
手亟還州治殺其家三十六人藏於坎縱火自焚
蠻至求屍皆不得屠郡民五萬餘人隕三州城以
填江初邕被圍既困緘憤沈起劉彝致寇又不救
患欲上疏論之屬道梗不通乃榜其罪於市冀朝
廷得聞焉神宗聞緘死嗟悼贈奉國軍節度使諡
曰忠勇起與彝皆坐謫官後交人謀寇桂州行數

舍其衆見大兵從北來呼曰蘇皇城領兵來報怨

懼而引歸邕人為緘立祠元祐中賜額懷忠

本傳

張頡字仲舉鼎州桃源人第進士熙寧中為廣西
轉運使會建廣源為順州將城之頡謂無益朝廷
從其議後遷知桂州入覲帝首言卿鄉者論順州
不可守信然時黎酋首領陳被蓋請出兵自効言
者謂宜有以撫納之毋令相誘為患命頡處其事
頡使一介往呼之出補以牙校喜而去詔問何賞

之薄對曰荒徼蠻蛋得是足矣尋罷兵海外訖無

事後徙知荆南至都門暴卒

節本傳

趙奎熙寧八年知白州為政有方愛民如子民不

忍欺

粵西文載

劉誼字宜翁長興人元豐初提舉廣西常平上言

廣西一路戶口二十萬而民出役錢至十九萬緡

先用稅銀數出稅數不足又敷之田米田米不足

復筭之身丁廣西之丁既稅以錢又筭以米是一

身而輸二稅今即未能蠲除而又益以役錢甚可
憫也請詔西監司提舉司官吏月給計數約損兩
路丁米亦可以寬於是遞減月給錢二千歲減役
錢一千二百餘緡又請罷買沈香減鹽價四十餘
事上稱其論事有陸贄之風會王安石銳意新法
極諫不便坐黜歸

舊志
宋史
食貨志

熊本字伯通鄱陽人元豐中宜州蠻擾邊除龍圖
閣待制知桂州至則諭谿峒酋長戒邊吏勿生事

請選將練兵代戍益市馬以足騎兵宜州遂無事
民蔡寶珍扇龍蕃與峒戶相仇殺欲引兵致討以
為功本質之色動縛而投之海蠻夷以為神轉運
判官許彥先議通湖鹽於廣西計口授民度可得
息三十萬本言桂管民貧地瘠恐不堪命議遂寢

節舊
志

蕭注字巖夫江西新喻人磊落有大志喜言兵初
攝廣州番禺令時儂智高圍州數月勢甚急注自

圍中出募海濱壯士得二千人乘上流因颶風起
縱火焚賊舟破其衆城獲全以功擢禮賓副使廣
南駐泊都監賊還據邕管余靖患其嘯誘諸酋以
屬注注挺身入蠻中施結恩信狄青師次賓州召
會諸將疑注倚賊聲勢為姦利欲遂誅注泊破賊
青始聞注前功以知邕州智高走大理國其母與
二弟寓特磨道注帥師討擒之又募死士使入大
理取智高至則已為其國所殺函首歸獻居邕數

年陰以利啗廣源羣蠻密繕甲兵乃上疏陳交趾
可取狀願馳至京師面陳方略未報而甲冑申紹
泰犯西平五將被害諫官論注不法致寇罷為荆
南鈐轄提點刑獄復責泰州安置會近臣有訟注
廣州功者起為右監門將軍邠州都監熙寧時有
言交人挫於占城衆不滿萬可取者遂以注知桂
州入覲神宗問攻取之策注謂兵無常形國家與
交今昔時勢異宜言交人兵不滿萬者妄耳既至

桂種酋來謁注延訪山川曲折老幼安否均得其
驩心有獻征南策者輒不聽會沈起以平蠻自任
帝使代注注歸卒

參本傳

王竒汾州人元豐間為湖南都監徙廣西宜州時
蠻寇邊竒領兵至天河縣期旦日會戰裨將費萬
夜以衆竊出河泥隘戰沒經畧使移書迫竒竒不
能堪後數日蠻衆萬人聚集竒輕出遂敗麾下數
百人勸策馬逃去竒罵曰大丈夫當盡忠報國何

走為戰而死詔贈皇城使忠州防禦使官其子六

人賜金帛

本傳

王次翁字慶曾濟南人廣西轉運判官時劇賊馬友等據長沙帥檄漕司預鳩糧芻三十萬以備調發次翁曰兵未必發先擾民可乎吾以一路常平上供計之不啻二十萬足矣已而賊不犯境

舊志

張田字公載澶淵人知桂州異時蠻使朝貢者與方伯抗禮田獨坐堂上使引入拜於庭而犒賄加

腆土豪劉紀盧豹素為邊患畏田不敢肆京師禁兵來戍不習風土往往病於瘴癘乃以兵法訓尚丁而奏罷戍田為人忼直自喜臨政以清蘇軾嘗

稱為古廉吏

節本傳

俞獻卿字諫臣歙人為昭州軍事推官會宜州陳進亂象州守不任事轉運使檄獻卿往佐之及至守議棄城獻卿曰臨難苟免可乎賊至當力戰不勝有死而已奈何棄去初昭州積緡錢鉅萬獻卿

盡用平糴至積穀數萬及是大兵至賴以餽軍

本節

傳

袁抗字立之南昌人官桂州司法叅軍撫水蠻寇

融州以抗權融州推官督兵糧與謀軍事抗即楊

梅石門兩監建水柵二據其衝賊不得入

粵西文
載叅本

傳

徐的字公準建州建安人累遷尚書員外郎擢廣

南西路提點刑獄安化蠻攻殺將吏所部卒畏誅

欲謀叛的馳至宜州慰曉之曰爾曹亡懼能出討
賊猶可立功以自贖若朝叛則夕死非計也衆皆
斂手聽命奏復澄海忠敢軍後皆獲其用

節本傳

謝麟字應之甌寧人由太常博士改西上閤門副
使詔使經制宜州獠降其種落四千八百人納思
廣尙民一千四百室得鎧甲二萬褒賜甚渥元祐
中知桂州融江有警麟以計平之戍兵從北來不
習水土麟部土人使極南而北兵止屯近郡賴以

全者甚衆卒於官

節本傳

徐勣字元功南陵人舉進士選桂州教授王師討交趾轉運使檄勣從軍餉路瘴險民當役者多避匿捕得千餘人使者勸勣杖之勣曰是固有罪然皆饑羸病乏不足勝杖姑涅臂以戒亦可已使者怒欲并劾勣勣力爭不變使者不能奪郭達宿留不進勣謂副使趙禹曰師出淹時而主帥無討賊意何由成功因具疏蠻人情狀請斷自上意既而

達高果無功

節本傳

鄧璧元祐中知賀州大興庠序置田購書來學者

甚衆

粵西文載

譚必江西人元祐間為邕州推官攝郡事會交人

復寇邕必輯兵抗禦力戰不克交人執之欲誘以

利必堅不可奪自縊而死

舊志

李亨伯字安正龍谿人紹聖二年知梧州興學勸

士卓有政聲

節舊志

孫立節寧都人崇寧間為桂州節度判官時謝麟
經制谿峒事宜州守王竒與蠻戰死立節被旨鞠
吏士有罪者謝因收大小使臣十二人付立節欲
盡斬之立節持不可謂於法不當盡戮因各互奏
部議如立節言十二人皆得不死

舊志

黨光嗣字明遠河西人崇寧初守宜州安化酋蒙
光有復嘯聚為亂光嗣與統制黃忱等擊敗之以
三州一鎮戶口六萬一千來降黃忱遂於安化撫

水蠻地置德勝寨

粵西文獻
叅宋史

黃璘大觀元年破南丹谿峒擒莫公佞公晟斬張

林松朱恩等徽宗賜書勞獎

粵西
文獻

蕭磐字安國閩清人宣和間權知梧州軍事課農

桑興學校百廢具舉暇則引諸儒飲射讀法有古

循吏風

舊志

祖世英字頴仲蒲城人政和間進士由知南昌縣

通判容州部使者薦知州事卒於任官至二千石

無一區之宅十金之產世稱清白吏

舊志

路彬字質夫晉陽人提點廣西刑獄所至輕身輒先詣獄悉記所繫名數隨取到館按問之枉者立釋獄遂以清時上供布錢過重彬獨抗章請減一

路稍輕

舊志

陳邁字伯亨其先自江寧徙永州初知辛縣有治績歷廣西轉運判官蔡京啓蠻瑤地建平從允三州邁言蠻人幸安靜輕擾以兆釁不可京惡之以

他事罷歸

舊志

梁順孫字景樞高要人為桂州監察判官監邕州橫山田州諸峒金坑往時監官多所需索峒丁苦之叛服靡常為朝廷患順孫撫諸峒以恩信不較其金諸蠻長聽服民歸者如市州人德之稱梁父

母

節舊志

清湘張令

失其名

建炎中侍御史馬伸撫諭荆湖廣

南過州縣必察民利病餽遺一無所受初至清湘

所在民羣聚遮馬首投狀乞留其令詢其善政皆
曰不知其他但知張公到後未嘗有吏下鄉伸即
以舉牒付民使以遺令衆歡然乃去

舊志

岳飛字鵬舉湯陰人賊曹成擁衆十餘萬由江西
歷湖湘據道賀二州命飛權知潭州兼權荆湖東
路安撫都總管付金字牌黃旗招成成遁飛至茶
陵奉詔招之成不從飛奏乞勦除許之飛入賀州
境得成謀者縛之帳下飛出帳調兵食吏曰糧盡

矣奈何飛佯曰姑反茶陵已而顧謀謬為失意狀
頓足而入陰令逸之謀歸告成成大喜期翌日來
追飛命蓐食潛趨遶嶺未明已至太平塲破其砦
麾兵掩擊賊大潰成走據北藏嶺上梧關遣將迎
戰飛不陣而鼓士爭奮奪二隘據之成又自桂嶺
置砦至北藏嶺連控隘道親以衆十餘萬守蓬頭
嶺飛部才八千一鼓登嶺破其衆成奔連州飛謂
張憲等曰成敗散去追而殺之則脅從者可憫縱

之則復聚為盜今遣若等誅其酋而撫其衆慎勿
妄殺累主上保民之仁於是憲自賀連徐慶自邵
道王貴自榔桂招降時以盛夏行師瘴地撫循有
方士無一人死癘者嶺表平

節本傳

張暉鄭州人建炎中知興業縣勞心撫字百廢具

興

粵西文載

鄧孝廉字清臣曲江人建炎間倅邕攝郡事邕歲
市馬界上吏多侵盜馬不時至孝廉盡革其弊歲

饑發廩賑之不足繼以俸金全活甚衆

粵西文載

徐夢莘字商老臨江人紹興間主管廣西轉運使
司文字時朝廷議易二廣鹽法遣廣西安撫司幹
官胡廷直與東西漕臣集議於境夢莘從行謂廣
西阻山正當仍官般法則害不及民廣東諸郡並
江或可容客販未宜遽以二廣概行議與廷直不
合廷直竟以客販變法得為轉運使夢莘既知賓
州猶以前議為梗法罷去不三年二廣商賈毀業

民苦無鹽復從官般法後擢直秘閣夢莘從子天麟字仲祥官廣西轉運判官所至興學明教有惠

政節舊志

高登字彥先漳浦人宣和間為太學生與陳東等上書者再紹興二年廷對無所顧忌有司惡其直授富川主簿提刑董芥聞其名檄讞六郡獄復命無賀州學事學故有田舍時已歸買馬司登請復其舊守曰買馬養士孰急登曰買馬固急然禮義

由學校出若遂廢則士與堂下卒何異守不能奪
卒歸之攝獄事守欲脫殺人者曰陰德可為登曰
陰德豈可有心為之殺人者而可幸免則死者寃
何自伸滿秩士民留不獲相率餽錢五十萬登辭
不可置於學買書以謝士後上時議六篇秦檜惡
其譏已授靜江府古縣令縣豪民秦琥所為多不
法登數其罪收治之琥忿而死古縣為秦檜父舊
治實生檜於此桂帥胡舜陟因諷登建祠欲以媚

檜登對以治亡狀不應立舜陟怒撫秦琥事誣登
專殺詔逮獄按之會舜陟亦以事下獄死登得白
已而攝歸善令復怒檜檜坐以前事取旨編管容
州謫居授徒家事一不介意惟以朝廷行事為已
憂戚臨終所言皆天下大計後朱熹為守奏乞褒

錄詔贈承務郎

節本
傳

何先覺紹興中通判橫州撰耕桑要備二卷

舊志

李彌大字似矩吳縣人紹興六年知靜江府奏廣

西邊防利害甚悉上多采用之召為工部尚書

舊志

沈晦字元用錢塘人紹興間為廣西經畧兼知靜江府先是南丹蠻莫公晟以歸附用為本路鈐轄後遁去旁誘諸蠻歲出為邊患晦遣將羅統往戍統至招撫諸蠻諭以恩信皆詣府請降晦犒賞之結誓而去自是公晟勢孤不復犯邊晦在郡歲買馬三千匹繼者皆不能及進徽猷閣直學士

郎本傳

杜天舉紹興中知潯州以教民造士為事擇師儒

董之罷其不堪為師者請更置之

舊志

呂愿中紹興中官廣西經畧安撫使先是朝廷用
廣南經畧安撫使劉彥適言以莫公晟知南丹州
事未受命是歲公晟始貢馬率羣蠻來歸帝諭輔
臣曰得南丹非為廣地但徭人不叛百姓安業為
可喜耳愿中諭降諸蠻三十一種得州二十七縣
一百三十五砦尚合二百餘及一鎮三十二團皆

為羈縻州縣

叅宋史

柴中行字與之餘干人廣西轉運司辟為幹官帥
將薦之使其客嘗中行中行正色辭拒攝昭州郡
事蠲丁錢減苗解賑饑羸轉運司委中行代行部
由桂林屬邑歷柳象賓入邕管問民疾苦先行而
後聞捐鹽息以惠遠民後累遷至秘閣修撰

本傳

陳太和字德容莆田人紹興中知象州虛心聽訟
使各盡其情民大悅築石橋以便往來蒞政三年

奏績居最

舊志

徐安國紹興間知橫州政以安民息盜為急人服

其知體要

舊志

范直方紹興間知潯州政尚寬簡邦人德之

舊志

陳宇莆田人紹興二十二年以大理正知梧州歲

旱手書救荒十餘事行屬縣由是米商四集人得

不饑留郡餘六萬斛建炎盜起增額且半宇累疏

得仍舊流徙來歸搖撞帖然

梧州府志

范應鈴字旂叟豐城人歷官知吉州歸養親讀書

泊如也起廣西提點刑獄力辭踰年乃拜命既至

多所平反丁錢蠹民力奏免之召為金部郎官

舊志

張孝祥字安國歷陽人紹興中廷試親擢第一乾道元年以集賢修撰知靜江府廣南西路經畧安

撫使聲績日茂

節舊志

李浩字德遠臨川人乾道六年以直寶文閣知靜江府兼廣西安撫浩至郡舊有靈渠通漕運及漑歲久不治命疏而通之民賴其利邕管所隸安

平州其酋恃險謀聚兵為邊患浩遣單使諭以禍
福且許其引赦自新即日叩頭謝過焚撤水柵聽
約束前帥建議於南丹州置買馬場朝廷將從之
浩力爭其不可遂止又朝廷令市象於交趾浩復
力爭治廣二年詔還浩天資質直立朝慨然以時
事為已任言切時弊為郡尤潔已自廣右歸不載
南海一物平生奉養如布衣時風采素高人不

干以私云

參本傳

范成大字致能吳郡人乾道九年知靜江府廣西
窘匱專藉鹽利漕臣盡取之於是屬邑有增價抑
配之弊詔復行抄鹽漕司拘鈔錢均給所部而錢
不時至成大入境曰利害有大於此乎奏疏謂能
裁抑漕司強取之數以寬郡縣則科抑可禁上從
之成大於理政之餘時務記述所著有桂海虞衡

志

節舊志

張栻字敬夫綿竹人淳熙二年知靜江府經略安

撫廣南西路所部荒殘多盜栻至簡州兵汰冗補
闕籍諸黥卒伉健者為効用日習月按申嚴保伍
法諭谿崗渠豪弭怨睦鄰毋相殺掠於是羣蠻帖
服朝廷買馬橫山歲久弊滋邊民告病而馬不時
至栻究其利病六十餘條奏革之諸蠻感悅孝宗
聞栻治行詔特進秩直寶文閣

本傳

吳獵字德夫醴陵人乾道中主潯州平南簿會張
栻經畧廣西檄攝靜江府教授劉焞代栻栻以獵

薦辟本司準備差遣盜李接起陷容雷高化貴鬱
林等州獵請賞勞誅罪惇於是錄鬱林功誅南流
縣尉鬱林巡檢人人驚厲爭死鬪不踰時盜悉就
擒尉宰相王淮甥也獵坐降官寧宗時起為廣西
轉運判官累遷刑部侍郎

本傳

蘇洸字澄老泉州人歷通判賓州時張南軒拭為
帥以廉吏薦除知雷州

舊志

吳庸道州人登淳熙特科為容州陸川簿尉時李

接反庸率衆捕禦身親六戰歿於陣帥臣劉煇上

其事贈承事郎蔭一子

舊志

王光祖淳熙中知昭州有德政及卒民立祠祀之

粵西文載

施埤毗陵人淳熙中知鬱林修建城池留心民務

時李接雖除餘黨尚出沒山谷埤親行禁諭捕治

逆黨招宥脅從民賴以安

舊志

林欽齡

粵西文載作次齡

淳熙中知貴州有政績部使者

嘗贈以詩有戶長盡蠲民不病室家相慶酒頻沽
農桑課績無遺恨循吏聲名並兩都之句

舊志

韓璧字廷玉淳熙間以經略司主管機宜文字用
張栻薦知宜州事清介愷悌修建學宮作興士類
先是養士之租歲入僅五十斛璧增至二百斛且
月撥公帑錢以助供給

舊志

廖德明字子晦南劍人初為潯州教授為學者講
明聖賢心學之要手植三柏於學潯士愛敬之如

甘棠後累官知潯州有聲公餘延僚屬及諸生親
為講說遠近化之常語人曰德明自始仕以至為
郡惟用三代直道而行一語而已

本傳

崔與之字正子廣州人始授潯州司法叅軍常平
倉久不葺天雨壞米撤居廨瓦覆之郡守欲移兌
常平之積堅不可守敬服更薦之調淮西提刑未
幾通判邕州守武人苛刻衣賜不時給諸卒大閼
漕司檄與之攝守乃密訪其首事一人斬之闔郡

以寧擢發遣賓州軍事郡政清簡尋特授廣西提
點刑獄徧歷所部秋毫無擾過州縣輒停車裁決
獎廉劾貪風采凜然嶺海去天萬里用刑慘酷貪
吏厲民乃疏為十事申論而痛懲之廣人刻諸石

號嶺南便民榜

節舊志

黃疇若字伯庸豐城人淳熙中以柳州教授調靈
川令會萬安軍黎蠻竊發經略司選疇若條畫招
捕事宜疇若謂須追原始亂為區處之方再任嶺

外用舉考改知廬陵縣官蹟所至弊根蠹穴剔除

殆盡以治辨稱

舊志卷
宋史

應孟明字仲實永康人淳熙十六年廣西謀帥帝
以手筆賜孟明曰朕聞廣西鹽法利害相半卿到
任自可詳究事實進直秘閣知靜江府兼廣西經
畧安撫初廣西鹽易官般為客鈔為戶無多折閱
逃避遂抑配於民行之六年公私交病追逮禁錮
民不聊生孟明條具驛奏除其弊詔從之

舊志

李椿字壽翁永平人廣西提點刑獄獄未竟者一
以平決之釋所疑數十百人奏罷昭州金坑禁仕
者毋市南物召為吏部郎中論廣西鹽法孝宗是
其說遂改法焉除樞密院檢校有小吏持南丹州
土官表求自宜州市馬者因簽書張說以聞椿謂
邕遠宜近故遷之豈無意今莫氏方橫奈何導之
以中國地理之近小吏妄作將啟邊釁說怒椿因
求去上慰諭令安職

舊志

詹體仁字元善浦城人知靜江府開十縣稅錢二萬四千蠲雜賦八千體仁少從朱熹學以存誠慎獨為主嘗言居官涖民之法盡心平心而已盡心則無愧平心則無偏世服其確論

舊志

陳大紀字正之永嘉人嘉泰間知象州徙知橫州秩滿適妖賊侯廣李監六作亂鬱林桂州並為賊區大紀奉檄即行節制飛虎摧鋒兩軍號令威嚴親冒矢石與士卒同甘苦開誠諭賊散其黨與擒

其渠魁訖事僅五月以功轉兩官

舊志

范克信字允誠丹陽人嘉定間官廣西經畧安撫
使措置買馬事時蠻酋岑汝弼與黃璫爭利因誘
谿崗掠諸賣馬者以故馬不時至克信既馳書諭
蠻出馬而岑黃方構兵克信馳往諭之乃各罷兵

粵西
文載

吳純臣番禺人以崔與之薦除提點廣西刑獄剖
析無滯民有醉入仇家適仇之母死遂誣之獄成

矣純臣察其情釋之一境以為神明

舊志

林干嘉定中為邕州監官清正自持郡守斂金以

媚時宰干不應後被誣罷去人甚惜之

舊志

蔣南金字聲道蘇州人嘉定五年知容州興學校

立貢院在任三年一以教養為事未嘗豫逸

舊志

林忠字仲山福建人嘉定間守全州日偕諸生講

明道學勉敦實行在郡九年多惠政士民德之

舊節

志

趙崇憲字履常汝愚子嘉定八年知靜江府廣西
經畧安撫使靜江屬邑地肥磽畧等而陽朔修仁
荔浦之賦獨倍自張栻奏減人猶以為病崇憲請
再加蠲減詔遞損有差羅蔓尚者仍歲冠鈔為暴
實土民何嚮父子陰導之崇憲捐金繒付小校繫
以來寘之法因嚴民夷交通之禁先是部內郡邑
有警輒移統府兵戍之在宜州者百人古縣半之
崇憲謂根本單虛非所以窒姦萌乃於其地各置

兵如戍兵之數而斂戍者以歸邕為邊要害地自
狄青平儂智高所設扞防甚至歲久浸弛而谿崗
日强崇憲條上其議朝廷頗采其言然未及盡用
也其弟崇模字履規亦知靜江有政聲

本傳

李閱祖字守約光澤人官靜江府臨桂簿提刑方
信孺漕使陳孔碩咸咨以臺事暇日詣學與諸生
講解士習丕變辟古田改廣西帥屬勤慎明恕諸

司論薦改秩未赴卒

舊志

張垓紹定中知橫州土瘠民貧家無餘藏歲遇旱

澇無假貸之處垓置米千石立為社倉民賴之

舊志

姚希得字逢原漳州人以直寶謨閣廣西轉運判

官兼權靜江府尋授直徽猷閣知靜江府主管廣

西經畧安撫司公事兼轉運判官希得忠亮清儉

好引善類廣西官署以錦為幃幕希得曰吾起書

生安用此命以繒纈易之

舊志

楊大異字同伯醴陵人提點廣西刑獄兼漕庾二

司所至姦吏屏息盜寇絕跡凡可以為民興利除
害者必奏行之建宣城書院祀張栻呂祖謙廣海
幅幘數千里道不拾遺報政稱最

舊志

方信孺字孚若莆田人從廣西轉運罷歸復以提
刑至政簡刑清所至不擾宜州守張自明建龍谿
書院信孺捐醵錢二十四萬助之又捐四十萬買
田給諸士於是宜士斌斌嚮風矣

舊志

梁介三衢人端平元年攝守容州留心教事增置

學田容人祀之

州志

張自明字誠子建昌人以宜州教授攝州事施政循良大興教化新郡學宇又以州用贏錢二十萬

作龍谿書院後授宜州知州

舊志

董槐字廷植濠州定遠人淳祐六年知靜江府權廣西運判兼提點刑獄槐即日就道至邕州上守禦七策邕州之地西通諸蠻夷南引交趾及符奴月烏流鱗之屬數寇邊槐與約無相侵推赤心遇

之皆伏不敢動又與交趾約五事一無犯邊二歸
我侵地三還擄掠生口四奉正朔五通貿易於是
遣使來獻方物大象南方悉定

本傳

李曾伯字長孺河內人淳祐九年知靜江府無經
畧安撫使元兵自滇入侵廣右曾伯積穀練衆繕
城浚隍為必不可犯之計援軍至者禮遇其將甚
備軍不敢擾且樂為用元兵知不可攻北去曾伯
遣軍躡其後敗之黃沙又敗之衡山湘桂以寧

舊志

胡穎字叔獻湘潭人自廣東移節廣右治踵李曾

伯先後在鎮拓鑿最盛足稱金湯

舊志

黃鼎知邕州建學育才鼎新州治人咸德之

粵西文載

譚惟寅字子欽高要人淳祐間知容州建思賢堂

紀元次山等五賢善政儆其行事又於堂之東西

作延老樂山二軒其說曰延老者於此問政也樂

山者因容山以取義也有契於心以靜為德仁者

之事也又嘗論祭禮曰治道不在多端在於致敬

而已舉斯心無一毫人偽則鬼神情狀天地萬物之理畢見於以臨政何所往而不當時人以為確

論

舊志

趙若詵字子振咸淳十年知容州叛賊楊先攻城若詵與戰力屈死之

舊志

鄧得遇字達夫邛州人累官通判隆興府監行在藏庫出知昭州遷廣西提點刑獄逾年攝經畧事無知靜江府德祐元年長沙被兵得遇遣都統馬

驥馬應麒赴援驥潛叛而還得遇斬之軍事悉委
之應麒未幾馬墜代間議事不合二年移治蒼梧
靜江破得遇朝服南望拜辭書幅紙云宋室忠臣
鄧氏孝子不忍偷生寧甘溺死彭咸故居乃吾潭
府屈公子平乃吾伴侶優哉悠哉吾得其所遂投
南流江而死

本傳

劉子薦字貢伯安福人父夢驥知澧州沒於王事
子薦以父任為湘鄉尉歷官知融州陞辭度宗慰

之曰廣郡凋瘵賴卿撫摩子薦對曰臣當推行德
化以安其民至官以廉靜著聞主管仙都觀廣西
經畧司檄為參議官德祐二年十一月北兵至靜
江權經畧使馬堅遣子薦提搖兵藥弩手守城東
門勢不支時瀛國公已入燕子薦取笏書我頭可
斷膝不可屈於上登城北望再拜取所衣袍瘞之
語左右曰事急不可為吾惟以死守城陷死之本傳
馬堅宕昌人也一家父子兄弟皆以忠勇為名將

而堅與其兄堽特顯咸淳中堅知欽州徙知邕州
邕地接六詔安南旁通諸谿崗撫御少失宜往往
召亂堅鎮撫諸蠻及治關隘皆有條理大理不敢
越善聞安南不敢入永平諸崗皆上帳冊邊陲晏
然未幾以左武衛將軍徵入朝已而宋亡堅因留
靜江總屯戍諸軍護經略司印守城總管俞金及
湘山僧宗勉招諭之皆為所殺元平章阿爾哈雅
至廣西為書反覆千餘言許以廣西大都督終不

聽乃進兵攻之堅發所部及諸崗兵守靜江而自將三千人守嚴關鑿馬坑斷嶺道元兵攻嚴關不克乃以偏師入平樂過臨桂夾攻堅堅兵敗退保靜江哈雅錄所賜詔示堅堅焚之殺其使哈雅復數使人招降堅發弩射之攻三月堅夜不解甲前後百餘戰城中死傷相藉訖無降意城東隅稍卑元軍陽攻西門以精兵夜決水牯攻東門破其外城堅閉內城守又破之堅率死士巷戰傷臂被執

殺之斷其首猶握拳奮起立踰時始仆黃文政淮人也戍於蜀軍潰間道走靜江馬堅邀與同守城破文政被執大詬不屈元軍斷其舌以次剗削之比死罵不絕聲堅部將有婁鈐轄者失其名靜江破邕城即相繼降婁獨以二百五十人守月城不下阿爾哈雅笑曰是何足攻圍之十餘日婁從壁上呼曰吾屬饑不能出降苟賜之食當聽命乃遺之牛數頭米數斛一部將開門取歸壁復閉元軍

乘高視之兵皆分米炊未熟生齋牛啖立盡鳴角
伐鼓諸將以為出戰也甲以待婁乃命所部入擁
一火炮然之聲如雷霆震城城皆崩煙氣漲天外
兵多驚死者火熄入視之灰燼無餘

宋史

仇子真知慶遠府德祐元年與淮東兵馬鈐轄阮
克己各將兵入衛詔與張世傑張彥分道出擊元

軍

通鑑

元

史格字晉明憲宗授節度使至世祖時加定遠大將軍從攻靜江格伺隙攀堞蟻附而上拔之徇廣西十四州皆下諭降谿峒諸夷五十州時宋陳宜中張世傑立益王昞於福州傳檄嶺海聲言夏貴已復瀕江州郡諸戍將恐江路既絕不可北歸皆還靜江行省議棄肇慶德慶封川併兵戍梧州格執不可示敵以怯增兵備之劇賊蘇仲據鎮龍山稱王劫掠於外耕植於內官軍畏暑不敢深入橫

象賓貴四州皆被其害格築堡於其界守以土兵

令官軍盡焚廬柵踐其禾稼仲窮蹙遂降

粵西文載

張礎字可用通州人至元中礎自浙西遷嶺南廣西道提刑按察使時廣西宣慰使穆爾圖怙勢橫暴強奪民財莫敢問礎至按其罪請論如法衆心

乃安

叅舊志

劉志行江西人元進士知藤州之鐔津

舊本作鐔州元時無

此州今依沿革志改正

有善政民愛之

粵西文載

多爾濟河西人世仕濮州至元二十二年以宣武將軍任橫州總管府達噲噶齊食邑守土有修學

之功

舊志

劉國傑字國寶女真人以湖廣左丞征廣右賊至元間平懷集諸砦二十六年擒蕭大獠於懷集破曾大獠於金林賊深入保險國傑鑿山而入殺賊衆五千人次賀州兵士冒瘴皆疫國傑親撫視之療以醫藥多得不死永州盜李末子千七寇全州

敗官兵殺郡長官國傑追討擒之上思州黃勝許
恃其險遠與交趾寇邊國傑身率士奮戰賊不能
敵走象山山近交趾皆深林不可入乃度其出入
列柵圍之徐伐山通道且戰且進拔其砦勝許挺
身走交趾擒其妻子殺之盡取賊巢地屯田募慶
遠獯人耕之以為兩江蔽障詔遣使即軍中以玉
帶賜之

本傳

烏克遜澤字潤雨臨潢人至元二十九年為廣西

兩江道宣慰副使僉都元帥府事兩江荒遠與百
夷接不知禮法澤作司規三十有二章以漸為教
其民至今遵守之又省廐置二十二所以紓民力
歲饑請蠲租發象州賀州官粟三千五百石以賑
既發乃上其事邕管徼外蠻數為寇澤循行並得
阨塞處布畫遠邇募民伉健者四千六百餘戶置
雷留那扶十屯列營堡以守之陂水墾田築八堰
以節瀦洩得稻田若干畝歲收穀為軍儲邊民賴

之舊
志

臧夢解慶元人至元三十年為廣西肅政廉訪副
使故事烟瘴之地行部者多不躬至而夢解咸遍
歷焉遂按問賓州藤州兩路達嚕噶齊與凡貪官
奸吏置於法者無慮八十餘人又平反邕州黃震
被誣贓罪及藤州唐氏婦被誣殺夫罪凡兩冤獄
夢解剛直廉慎學有淵奧而敏於政事歷官所至
以清能著嘗自號魯山士大夫稱不以官而曰魯

山先生云

本傳

朱國寶寶坻人至元間以管軍萬戶鎮梧州領安撫司事南寧謝有奎負固不服國寶開示信義有奎感悟以其屬來歸於是黎民降者三千戶蠻酋降者三十所

粵西文載

蕭泰登字則平吉安路人至元三十一年使安南歸為江西儒學提舉僉嶺南廣西道廉訪司事陳便宜二十五事柳州左道謀叛論死者二百人泰

登錄之而釋不知情百三十七人他所辨雪亦無
算凡黜貪謬又二百一十人進階奉直大夫

參舊志

謝讓字仲和潁昌人大德間為湖廣行省左右司
郎中時廣西兩江岑雄黃勝許等屢相仇殺為邊
患讓謂此曹第可懷柔不宜力競寬其法以羈縻
之使不至跳梁可也若乃舍中國有用之民爭炎
荒不毛之地非長策也因書榜招諭以攜其黨

本傳

姬明成宗大德七年知容州興學校勸農桑為政

多持大體州人思之

舊志

周自強字剛善新喻人泰定間廣西峒徭反自強往見徭酋說以禍福中其要害徭酋立為罷兵事聞超授廣西兩江道宣慰司都事累遷縣尹有廉能聲以亞中大夫江州路總管致仕

節本傳

呂思誠字仲實平定州人剛直敢言文宗時累官監察御史劾中書平章徹爾特穆爾變亂朝政章留中思誠因求去出僉廣西廉訪司事巡行郡縣

土官有于元帥者恃勢魚肉人恐事覺陰遣其子
迂思誠於道思誠縛之悉發其陰私痛懲其罪一

道震肅

節本傳

文魁字華甫衡陽人至順三年知藤州兵革之餘
披荆棘立州治修城池興學校撫民庶蠻寇出沒
而藤獨無擾政化大行

州志

石亨祖字元卿真定人至正己丑全州路總管時
獠入寇城邑民居靡有存者亨祖率郡人黃世榮

築城郭建學宮設立上下公署尙寇攻掠親詣廣西乞師民賴以安在任三年百廢具興民頌其德

卒於官

州志

任珪至正間知橫州路總管廉明公正人不敢干以私惟以惠民為務邦人懷思勒其德於石

州志

余永至正間以湖廣省宣使權知平樂先是學宮在考槃澗西燬於兵拓拔元善攝郡監覈學租捐俸募民新之永受規畫程功之力居多

府志

陳本道至正間守貴州時尙賊圍州城本道率兵出戰身先士卒賊遂敗去時稱文武才邑人賴之

立祠以祀

舊志

祝蕃至正間潯州經歷一夕課子讀書忽旋風滅燭戶外若有人稱黃氏來訴寃者比開戶視四無人跡詰旦審獄果有黃姓者竟得寃狀兄弟八人同坐止罪其一餘皆釋之

舊志

馮思齊樂城人至正間知藤州律身廉潔馭下寬

簡民懷其德

粵西
文載

花禮至正間知容州正風化建學校為民興利卓

有政聲

粵西
文載

侯元采貴州吏目至正間署州事時城池頽廢捐

已資傭民築濬一日崗賊出掠元采偕弟信卿帥

兵逆戰生擒賊八人斬獲無算廣西海北二司交

章薦之

粵西
文載

額爾吉納字尚文唐古氏人至正間授廣西行中

書省平章政事兼肅政廉訪使時紅巾擾攘賊入
湖南嶺表震動衆議建築城池以扼險要遂捐俸
於官貿易海鹽積以歲月息倍至萬經制之費皆
出於此四年而克終事民忘勞焉吉納善結衆心
一時驍將材士多歸之故保有境土二十餘年洪
武元年總兵楊璟取廣西吉納堅壁不下後城破
被執送京師不屈死之郡人感其恩立廟以祀陳
瑜字仲庸雷州人吉納辟為廣西行中書省都事

廣西被圍吉納未嘗歸私第瑜事之甚謹城破以
佩刀自刎有湘潭劉永錫與瑜同事率妻子溺於
白龍池死又義兵千戶曾尚賓者江西人吉納嘉
其義勇擢任之明兵圍靜江尚賓守西城及城陷
身中數鎗猶力戰不衰後衆寡不敵遂自焚其家

死之

祭舊志

廣西通志卷六十五